

23

HARVARD COLLEGE LIBRARY
FROM THE
HARVARD-YENCHING
INSTITUTE

SEP 30 1929

~~Ch L 5570-2928~~

7/2928

T 5237-782928

明詩綜卷五十四

小長蘆 朱彝尊

錄



射襄 周 耒 緝評

朱國祚

五十八首

鄞縣林時對填錄

先公字兆隆號養淳秀水人以太醫院籍補順
天府學生萬曆壬午中鄉試明年癸未賜進士
第一人除翰林院修撰知起居注己丑充會試
同考官辛卯典試江西歷司經局洗馬遷諭德
丁酉典試應天進右庶子戊戌以禮部右侍郎
兼翰林院侍讀學士攝禮部尚書事壬寅轉吏
部右侍郎引疾歸光宗即位起南京禮部尚書

是年命入東閣加太子太保進文淵閣壬戌主
會試尋以戶部尚書兼武英殿大學士加少傅

回籍卒贈太傅謚文恪有介石齋集

曹潔躬云吾鄉
鉅公若呂文懿

項襄毅屠康僖朱文恪俱研心風雅而不與作者爭名文恪詩尤婉秀
軒軒霞舉一無俗塵望而知其品之清也 朱朗詰云先大父文懿公
嘗過秀水文恪不出迎既升堂先公意不懌詢之則文恪袍帶留質庫
方令人取之歎息不置其清介如是詩亦非肉食人語正如冰荷在壑
冷香襲人 陸麗京云易稱知幾詩詠明哲朱文恪足當之聞利瑪竇
進異物公曰此輩小智足以惑人將來必有助之更曆法者景陵詩派
初行公覽之驚曰安得此亡國之音吾不忍見之也知幾其如神乎
俞右吉云太傅清而能容質而有體忠著三朝無事不可為後世法
即以詩論自抒性情不事沿襲諸體俱合不失正始之音 鍾廣漢云
文恪處門戶紛爭之日中立不倚人所難能建儲事公私疏七十一其
劾鄭國泰云本朝外戚不與政事冊立非國泰所宜言可云犯顏強諫
不畏疆禦矣而吳人有先撥志始一編沒而不書則以公名不列東林
之籍也尚得謂公非公是乎公與福清同年入翰苑同典試南畿晚歲
同心輔政聞福清初告歸中塗絕不會客獨過公譚讌三日然後行公
贈詩有拙免書鈞黨衰猶話典墳公蓋自安於无咎无譽矣公初不以
詩名而同時浙右諸公未有過焉者 萬曆之初詩家陳陳

相襲風雅幾於喪矣獨嶺表歐楨伯黎維敬區用孺三君旗幟一新
丁初發時樵李則朱太傅兆隆李博士伯遠吳興則鄭侍御允升皆不
沿七子之派近見 集止推一程孟陽何也 繆天自云定

陵中歲吾鄉朱文恪公業與臨胸馮文敏同被命入閣將宣麻矣沈閣
老蛟門以密揭止之遂以少宰歸田獲車栗杖偕同里郁伯承游天台
鴈蕩諸山吟詠不輟其詩率寫胸臆未嘗摹仿前人惜其集未刊行爲
鄉曲一老儒塗竄朱墨
混淆難辨失其真矣

雩禱篇

朱鳥協上序蒼龍啓佳辰我后隆祀禮羣生潔明裡紺
筵羅彩旒瑶圖吐文茵雲歌逐清漢鳳管徹蒼旻蘭羞
既云薦精誠亦已伸靈液以時敘而康億兆人

同葉給諫過鐵柱觀 有序

南昌鐵柱觀相傳為晉旌陽令許遜鎖蛟處按
唐李白詩云浪動灌嬰井潯陽江上風豫章城

灌嬰所築疑此即灌嬰井也萬曆辛卯九月予
與葉給事典江西鄉試畢偕游是觀覽其遺跡
證以李詩給事然予言爰賦詩十二韻以紀其
事

微瀾遠通江水黑照無影誰鎖戟尾蛟繚以千丈縁神
州八柱外於此得塹穿地戶闢趙尊真靈位陶景人言
毋支祁神禹昔鉗頸要當去民患不在遠方屏凍鐵斷
繡花終古但嚴冷九派潯陽流有時風力猛潮生浪亦
動疑是灌嬰井比於渴馬厓術可驗棟黓我言殊怪牒
給事默心領請誦白也詩可以發深省

九日飲涵虛閣和葉進卿作

傑閣峙層霄來游屏鬱快晴臨山靄逼遠見宮雲敞天
氣日以清江光一何爽嘍嘍候鴈鳴汎汎寒潮長登高
循令序勝引屬吾黨甄藻協夙心爨桐得新賞絲糕乍
出榼細菊且浮醢席移鳥遷樹坐久月承幌一唱白雪
音滋我丹霞想

蘇州送君輿姪赴試北上

駕言勞舟發送爾出金閭游子將何之行行入帝鄉帝
鄉日已近佳氣逾蒼蒼俯視碧水流仰看浮雲翔情隨
水偕遠意逐雲俱長重寶抱璠璣殊材堪棟梁努力獻
文賦佇聽聲名揚

天台道中同郁伯承賦

游目覽層峰攜手攀高嶺舉步若登天畏塗復顧影喬
柯聳白雲深壑陷丹井落日猶半規山色已先暝但愁
寒虎嗥不嫌老鶴警忽聞下方鐘頓使千慮屏安得百
丈厓繼以兩修綆

天台

人言天台高四萬八千丈中有瀑布泉飛流衆山響多
少采藥人石梁不得上我思斲壽藤削作過頭杖拄上
最高峰雲中一拊掌

俞右吉云王獻之能為一筆書陸探微能為一筆
畫郭恕先能為一筆風箏圖此詩雖五十言一氣
融貫即謂之一筆也可

石鼓歌

橋門左右獵碣十形如古礎相排連窪中或與鼈臼似

抱質可敵瑤琨堅傳聞書自太史籀比於大篆尤瑰妍
其辭典奧儷二雅彷彿吉日車攻篇周京遺製衆所信
疑義莫定文成宣紛綸雖滋翟鄭議審視終異秦斤權
下逮宇文豈能爾齊堂所見毋乃偏嗚呼神物不易覩
三代舊跡稀流傳巫咸告辭熊相詛裕陵寶惜今棄捐
比干銘折衛州壤穆滿書徙壇山巔會稽寔石字茫昧
岫嶠祕跡文糾纏倚撫非乏好奇士千搜萬索無真詮
詎若十鼓離復合陳倉入汴還留燕羶包席裹橐駝背
塵蒙露濯瓜牛涎置諸太學始皇慶于今又歷二百年
深檐五丈密蓋護不受長雨闌風顛我來摩挲輒終日
證以郭薛施潘箋凝思斲桐來自蜀叩之定有聲淵淵

文殘非因硬黃塌劃缺反撼鈞金填長廊無人起題壁
回視落景棠梨懸

少年行

長安少年意氣豪雕鞍寶騎金錯刀呼盧百萬等土壤
報讎一死輕鴻毛自言生爲游俠子願輸肝膽酬知己
此時未遇平原君且學鬪雞都市裏朝游紫陌黃金堤
暮宿瓊樓桃李蹊探丸直向杜陵北挾彈頻過渭水西
一聞邊警還投袂轉戰前收漠南地介子身封萬戶侯
嫖姚家賜千金第

瑣里行

海外大九州一稔一粟島嶼浮是何瑣里國治曆知春

秋髯槃驗一綫鍼將子午求曾未識中夏帆從何處收
虬鬚鵲眼顛其面海舶初來寄江甸巧將製器媚中涓
自鳴鐘獻黃金殿吾思曆象由羲和縱有歲差良不多
豈容小邦定正朔倒置列宿成愆訛古來明王異物恒
不貴遠人留之甚無謂况乎天官有禁祕不傳毋俾此
輩紊我靈臺篇

雪

夜來千里雪曉起徧長安轉覺西山近宜從上苑看河
冰難渡馬野艇盡投竿最苦東征士關門擊柝寒

經寧庶人廢苑和葉給諫韻

吳凜何知反劉安但自尊魚鹽時不利雞犬爾焉存俘

已儒臣獲軍猶鎮國屯白頭遺父老尚說獻王孫

瀛洲亭新池

奪玉燕山石疏泉太液流采桑傳自李鑿井舊聞劉

謂李

文正劉
文安也

浴鳥牽萍起纖鱗撥荇游相看無限意落日且淹

留

杜門

杜門甘寂寞無事獨登臺白日旦復旦浮雲開未開幾
聞鳩化眼孰藉鳩為媒只合還山夢輕帆一舸回

同周公瑕屠緯真俞羨長石湖玩月分賦得天字
今夜清秋月江橋一串懸樹深潛滴露水闊不分天滿
載官廚酒聽彈商女絃薄寒風漸緊主客未迴船

初夏過沈純甫穆湖村舍

逐臣歸嶺外近住穆湖村油菜齊抽甲珠藤不露根漉
湯貓竹筍下酒鴨餛飩滿篋新詩卷曾無諫草存

新昌石佛寺

石佛何年寺空山麗相存一音不可說兩足此為尊雲
起長迷路厓傾自作門篋輿下坡暝回首月明村

雨夜

黯黯浮雲色蕭蕭急雨聲人難今夜睡天慮此時傾茅
屋牀牀漏菱池曲曲平愁心如曷旦不避暗風鳴

葉進卿出都訪予里第話舊三日臨行景德寺餞

別 三首

自我辭京闕公今亦避賢一舟旋泛宅萬事且歸田西
日雲仍蔽東溟海未填無由慰朝野把酒強陶然
燒尾偕通籍揚眉共校文由來真臭味相逐比龍雲拙
免書鈞黨衰猶話典墳相留三日醉離袂忍輕分
景德前朝寺經過路舊諳到門三貝塢負郭一龍潭別
思花重驛離筵酒半酣平泉新草木須滿道山南
金銘寺訪秋潭上人

湖上

峰頭寶所塢湖上水仙王芳草年年綠風荷岸岸香
鞦韆細雨對酒易斜陽不計重門遠瓜皮上小航
繇桐廬經釣臺下作

藥草仙人錄星文釣客槎祠開高下屋江溜淺深沙
綠樹緜蠻鳥丹崖躑躅花誰歌竹如意懷古一長嗟
萬壽寺

貝葉三車少華鍾萬石餘聲仍到長樂地合置精廬滿
灑人王界莊嚴學士書秋來霜落後流響更何如

聞蟬

燕臺歇雨薦涼颺吹送蟬聲滿御墀清影不教塵外見
長吟先入禁中知上林氣暖枝堪託仙掌秋高露復滋
撫罷五絃聽漸遠空庭疎樹午陰垂

西山謁景皇帝陵

戾園悽斷白楊風黃瓦今看天壽同北狩豈無通問使
南城專賞奪門功若教守土盟城下安得蒙塵返域中
多少諫臣司耳目昌言翻賴校官忠

追復景皇帝謚號由荆門州儒學訓導高瑤上疏言之

恭謁孝陵同葉進卿賦

夾道山松間石楠遙瞻暖翠鎖浮嵐靈龜玉殿十飛九

孝陵開穴時中有玉龜十其九飛去一存享殿馴鹿銀牌寸有三

鍾山鹿千百為羣有懸銀牌者高皇時所畜牌約三寸第

少豐碑撰方練

陵無建文年碑悔多姦黨示胡藍

胡惟庸藍玉之獄高皇暴其罪有昭示姦黨錄

文皇帝後以目建文諸臣五雲縱護昌平嶺佳氣須知兆自南

孝陵感革除事同葉進卿作

四年萬事革除休遜國遺蹤何處求事去金川門不閉
心驚玉殿火初收空餘靈谷松千樹誰見文孫土一丘
未必西南到天末魂歸終傍孝陵遊

徐五修招游九峰三泖之勝晚過斜塘賦此

月落風微何處鐘斜塘岸岸柳惺忪疎星數點布碁局
宿鳥一羣衝釣舸潮水漸生黃歇浦野花齊放陸機茸
故人擬贈丹砂訣商榷栖山第幾重

天台道中

落月林梢一鵲飛赤城霞已照征衣水清幾曾鵝鴨鬧
屋小也有松筠圍白葛花香眠鹿起胡麻飯熟行人稀
當年劉阮本俗物到此何心苦憶歸

自北鴈蕩踰南鴈蕩觀龍湫瀑布作

靈域峒堯隱不知中藏七十二峰奇披衣正在烟深處
到面初無雨歇時謝客未曾經蠟屐貫休已後少題詩
洞天只恨流傳晚莫觀蟲書鳥篆碑

謁定陵有感述

乞歸自放潞河船息偃江湖二十年往事句臚成夢寐
重來弓劔莫攀緣要知孝為慈闈盡誰道恩從貴戚偏
猶記南宮封事入聽言終似轉圜然

自注國祚因請冊立東宮
効及鄭國秦先帝不之罪

終如
所請

恭謁慶陵作 二首

講幄頻趨鶴籞深重來就日慘崇陰十年始受東朝用

一月真傾下土心視榷盡收中使節披沙罷採卍人金

最愁日曆書難既龍去烏號涕不禁

枚卜纔宣三殿麻深宮遽晏五雲車翠微色映長陵樹

金粟堆開景帝窪北去重關遮鳥道西來一水抱龍沙

白浮村下園官近未夏雕盤已薦瓜

頒曆恭紀

閭門開曉日玉律下雲邊一紀逢羲馭千秋卜漢年靈
臺占氣早上苑得春偏瑞靄含莫莢懽呼雜管絃三辰
傳夏令萬國戴堯天欲進昇平頌慚無白雪篇

太學釋奠同郭美命行分獻禮畢周覽橋門石鼓

歸途成二十韻

上丁遲日麗咸秩辟雍先釋奠周官禮安歌魯國絃質
明期敢後分獻典宜虔宿鳥初離樹殘星尚在天百夫
趨陛戟萬舞列宮懸次第陳犧象從容執豆籩班居元
老次位近素王偏十子升堂舊千春配享焉循階登降
數薦帛節文全小大從于邁東西互折旋黃流纔灌地
朱燎已生烟畢奏咸和曲徐收廣殿筵更衣辭鷺序散
胙得羊肩坦步橋門外偕行獵碣邊形模度科臼歲月
昧成宣已免風霜剝無愁鐘簋遷四詩雖絰漏終古自
流傳坐久趨松日歸來竝杏韉協恭良不易同調最相
憐好琢燕山石題名廟學壩

西勾橋口占

東雉村邊水西溝橋下流濯纓人不至處處浴沙鷗

裂帛湖上作

水淨一匹練山圍六扇屏春風纔幾日藥甲已先青

即景

秋風靡靡吹舟入蘆花裏相呼隔岸人聲墮半江水

逢破瓢道人吳少君

山人愛一瓢時時負肩背貽我巨勝花來自白羊隊

東魯道上作

汶水又一曲龜山知幾重從今冰上渡應少赤狐蹤

東朝侍直

二首

殿庭香靄接雲平一道爐函夾陛行肅肅講臣齊鶴立

金蓮影裏喚先生

東華疎雨淨
雲埃奪玉階
平埽碧苔猶恐侍臣侵
履濕
宣從殿側左邊來

晚過天寧寺

郭外秋山百里晴
日斜深院晚涼生
十三層塔半扉影
一鳥不來風鐸鳴

題白雲觀

一言止殺古人難
多少逋臣藉爾安
辛苦捐軀文信國
得歸也擬著黃冠

夜泊淨業寺

僧樓佛火漾空潭
李廣橋低積水含
一夜朔風喧樹杪

薊門飛雨遍城南

西山湖上

芍藥闌邊花氣收
鷓鴣谷口斷雲浮
倦游愛說江鄉事
先試西湖一葉舟

卧佛寺

人傳蘭若春三月
花比青彌陀院多
惆悵芳時來獨後
但聞風葉響杪羅

碧雲寺

銀牘高懸寶地賒
游人只愛寺前花
不知賈舶徵求盡
舊鬼年年哭潞沙

秋入香山寺

山半松門度石梁
流泉泱泱響僧廊
置身著色屏風裏
梨葉新紅柿子黃

洪光寺

石門幾曲轉梯圓
殿僧同怖鴿棲
指點游人下山路
酒旗風颭夕陽西

夜宿鮑家寺

青豆房低結構牢
長松靜夜卷秋濤
分明一枕谿亭雨
睡起不知山月高

中峰晚望

中官丙舍即花宮
松柏林前梵磬風
試上精廬高處望
樓臺金碧夕陽中

摩訶菴觀杏花作

摩訶菴外袖吟鞭
繁杏春開十里田
曾與村翁舊相識
看花不費酒家錢

吳巨手云元時杏花齊化門外最繁東岳廟石臺羣公賦詩張謙傳為盛事葛邏祿易之詩云上東門外杏花開千樹紅雲遶石臺最憶奎章閣老白頭騎馬看花來至明城東花事衰郊西漸盛萬曆後摩訶菴杏花多至千株吾鄉朱太傅養淳詩云云承平之日翰苑風流後先一致也

祕魔厓

祕魔厓仄蘇文斑
千載盧師去不還
遺有澄潭二龍子
日斜歸處雨連山

嘉禧寺

山牆圍作化人城
榆柳陰濃信客行
始信精廬風日好
秋深猶綠牡丹坪

江上夜泊

江上扁舟一葉輕夜深燈火滅還明枕函未作寒山夢
卧聽潮聲帶雨聲

梅家蕩櫂歌

梅家蕩口蜺子黃瓜皮曾船七尺長剪取東園白頭韭
蛤蜊風味勝橫塘

李廷機一首

廷機字爾張晉江人萬曆癸未賜進士第二授
編修歷官太子太保禮部尚書文淵閣大學士
贈少保謚文節有集

靜志居詩話文節清畏人知奈為黨論所攻攢譏竦謂而君子之守確然生時以帖括名詩非專務聞蟬一絕正自翩翩

雨霽聞蟬

五雲初霽曙光流垂柳千條蔭御溝兩岸新蟬啼不住
隔林遙送漢宮秋

劉應秋一首

應秋字士和吉水人萬曆癸未賜進士第三授
編修遷南京國子司業尋以右春坊右中允管
司業事充日講官升洗馬歷諭德庶子以國子
監祭酒致仕贈禮部侍郎謚文節有劉大司成

集 鄒爾瞻云公詩文雍容舒徐出入韓歐間

詩話文節儒臣非有言責而上書請東朝冠昏劾首輔彈中樞可謂古之遺直已其言有云近代論相多取諸詞林詞林雍容雅度一切齷齪猥瑣曾不關其慮博而習于故靜而徹于幾能以事外之身策事成敗則惟詞林勝矣寥寥數言其占地步不淺詩非所務無疾雅音

送林仰晉謫茶陵

夕郎抗疏出金扉萬里衡陽一雁飛世路何年遷客少
聖朝今日諫書稀黃陵雨暗連青草嶽麓雲深濕翠微
千載汨羅人不見寂寥心事更誰依

葉向高四首

向高字進卿福清人萬曆癸未進士選庶吉士
授編修歷官坊局南吏部侍郎召為禮部尚書
入直東閣以少傅予告再召為少師兼太子太
師吏部尚書中極殿大學士卒贈太師謚文忠
有蒼霞草

詩話東林諸子奉福清為倫魁沙汰江河和調水火海內服其公忠歸
舊之日蘊藉風流銜左相之窪尊賭東山之碁墅詩品在山林臺閣之

間諸體
皆具

渡江即事

無嗟風土異已自邈關河村舍人烟少旗亭酒幔多春
寒芳草歇天闊斷鴻過長路方茲始微名奈若何

送林客部南歸

幾年共逐帝京塵此日那堪別恨新画省風流傳諫草
黃扉事業媿絲綸故園載酒宜清晝客路聽鶯屬暮春
君到里門應北望長安猶有未歸人

出關別江仲魚

心知惆悵對離觴一望郵亭十里長自與江郎黯然別
馬頭春草是他鄉

題趙子昂明妃出塞圖

三千粉黛泣長門嫁得單于亦主恩
貌取紅顏無限恨集賢學士宋王孫

周應賓 一首

應賓字嘉甫鄞縣人萬曆癸未進士改庶吉士
除編修累官禮部尚書掌詹事加太子太保回
籍卒謚文穆有月湖草

去婦詞

故人昨日新新人明日故同是機中人何必問縑素

郭正域 三首

正域字美命江夏人萬曆癸未進士改庶吉士

授編修歷中允諭德庶子遷南京國子監祭酒
入為詹事掌翰林院升禮部右侍郎卒謚文毅
有黃離草

詩話文毅坐妖書繫獄九死不悔可謂骨鯁之臣其論樂府云今人全用擬議而無變化令人讀之如挾陳人口中珠殆為于鱗輩發也又言文章不可學一家詩必自三百篇漢魏六朝下至唐人皆在胸中筆底乃稱作家蓋有志而未造其詣者

長安道

長安道春無花夏無草何不歸來山中好

遣祀景陵恭紀

宣皇陵廟天山裏王氣蔥蔥鎖帝梧只見丹臺餘寶鼎
不聞銀海繞金鳧千官露烏朝珠隴五夜雲車下紫都
記得當年巡幸日道傍駐輦問農夫

宣德十一年事

廬山五老峰

湖中五老峰去天不盈尺澗底白雲生五老頭俱白

岳元聲 一首

元聲字之初嘉興人萬曆癸未進士除旌德知縣改大名府教授轉國子監博士進監丞升工部主事歷員外郎中疏論首輔奪情落職起南京光祿少卿轉太常少卿再轉南太僕卿遷南兵部右侍郎進左侍郎有潛初子集

詩話侍郎立朝侃侃不阿里居有不平事弗避嫌怨力排眾議以歸於正所謂鄉先生沒而可祭於社者集中韻語罕存寄弟一律曾以題扇者蓋本岑嘉州嬌歌急管雜清絲之作後駮鸞錄暨公集均失載殆不知者嫌其失粘而刪去之也

寄仲弟慶遠守爾律

梅花花信春應早楊柳柳州種定曾天邊白雨愁卑濕瘴後黃茅苦鬱蒸秋風小鳥供行饌暗壑修蛇挂古藤駮鸞鳥續錄聞初就可似吳船范致能

申用懋 一首

用懋字敬中長洲人萬曆癸未進士除刑部主事改補兵部歷員外郎中遷太僕少卿再遷南京太常卿以右副都御史巡撫順天進尚書

薊門歸興

山河百二擁宸居亭障三千衛直廬要害直須勤版築軍屯好在理耰耞時議開復樂東漕河東巡直據玄菟塞北望頻傳白羽書自媿酬恩猶未得空留車馬賦歸與

姜應麟

一首

應麟字子文慈谿人萬曆癸未進士改庶吉士授戶科給事中以建言謫廣昌典史遷餘干知縣補龍溪起太僕少卿贈太常卿

秋懷

廿年投老此山丘倚杖閒看水獨流萬樹秋聲連斷峽一天涼雨過層樓因題楓葉開詩卷爲訪蘆花上釣舟日靜衡門無剝啄忘機惟得伴沙鷗

鄒德溥

一首

德溥字汝光安福人萬曆癸未進士改庶吉士授編修歷中允洗馬卒于家以講官諭祭有雪

山草匍匐吟

雨霽聞蟬

西山一望隔簾櫳柳暗花明御苑東斷續蟬聲聽不盡夕陽人立小亭中

王

荳

一首

荳字季孺慈溪人萬曆癸未進士改庶吉士授編修

題青牛出關圖

柱下藏名久知希未足論知榮翻守辱體物必歸根一望真人氣應占大道存若爲關令尹乞得五千言

徐應聘

一首

應聘字伯衡崑山人萬曆癸未進士改庶吉士授檢討歷太僕少卿

瀛洲亭對雨

祕閣清宵近蘭泉曲沼開宿烟生暮雨新水長秋苔地向蓬萊接波分太液來憑軒多爽氣疑在白雲隈

于若瀛九首

若瀛字子步濟寧衛人萬曆癸未進士除戶部

主事歷官右僉都御史巡撫陝西贈右副都御

史有弗告堂集

葉進卿云文若詩冷然起詣不襲世人片語而情景婉至無跡象可尋 王則之云文若近體

清曠秀倩出入開元大曆之間 焦弱侯云念東詩不激而高不刻而工雋永藏於溫醇纖穠寓之雅澹所稱治世之音非邪

詩話念東詩格未起然不屑作軟熟語

宿唐洞寺

野寺大道旁短垣倚雲嶠舍策叩禪關平蕪恣延眺暝色還荒徑明滅寒原燒篝燈坐幽室皎月來相照未稅塵鞅勞已窺靜者妙夜半風鳴條不減蘇門嘯

晚投清江浦

淮水吞江浦孤帆晚復開樹移沙岸轉波逆海潮迴人語迎邨雜漁燈拂櫂來繫舟猶未穩寒漏已頻催

高郵湖

高郵初挂席波起蕩湖邨遠水浮天白孤城過雨昏柳條依岸斷鷗鳥向人翻破屋稀烟火滔滔銷客魂

再過清涼寺

再入清涼寺高臺覽舊都金陵猶王氣石壁自雄圖密
樹依城合澄江入雨無六朝人事改瞻眺獨踟躕

雨宿潼關

明燈虛館淒清夜細雨蕭蕭亂客腸秋入關門悲鼓角
年來驛路老星霜家臨濟水菰蘆白壠接南山黍穀黃
千里故園愁阻絕夢還京國亦他鄉

時寄家
京邸

寄隱閣春興

小閣逶迤近水渠蕭條不讓野人居惟將藥裹供多病
不為花飛憶敝廬嬾散江邊清夢穩交游天上故人疎
亦知衰晚甘淪棄世事浮雲任卷舒

舟中雜興

兩岸山相似舟移曲不妨回看京口盡落照下丹陽

清泉寺

滿谷西風椒葉稀穿林片片凍雲飛荒原車馬應無數
閒殺山僧坐翠微

金陵春

晴雲曉壓石城孤江樹江烟淡欲無南雪未消靈谷寺
東風先綠莫愁湖

徐學聚

一首

學聚字敬輿蘭谿人萬曆癸未進士除浮梁知
縣調吉水擢禮科給事中出為山東提學副使
歷福建布政使尋以右僉都御史巡撫福建贈

副都御史 阮霞嶼云敬輿詩文自出機軸為藝林推尚

詩話弘正以前實錄儲秘館薦紳罕得寓目此祝希哲九朝野記徐昌穀剪勝紀聞等書多齊東野人之語自華亭在政府抄有副本弇州見之故史料始得其實敬輿國朝典彙一編亦從實錄采摭者也詩亦尚聲格惜所傳不多

夜宿日觀峰禪房

岱宗面面削芙蓉時有卿雲出漢封杖屨中天干象緯
風烟下界起蛟龍河流舊繞滄溟遠練影斜懸紫翠重
夜半石牀天籟發夢中錯認景陽鐘

來三聘 二首

三聘字任卿蕭山人萬曆癸未進士除黃梅知縣調合肥入為兵部主事歷官江西右布政使有祠部南舟豫章蜀游東游南華等橐 于念東云任卿詩格

律嚴整而一種恬淡之氣不減陶家風致

豫章夜雨

一月餘寒在高齋聽雨眠夜愁牽往事春夢入芳年才
拙官何補家貧俸未捐遙憐鏡湖水重負杏花天

解悶

春風吹煖百花新院麴香浮竹葉春今日酒拚今日醉
一年花老一年人浩歌聊借鶯為管醉卧何妨草作茵
高興未闌天欲暮攜壺帶月問西鄰

何出光 一首

出光字兆文扶溝人萬曆癸未進士除曲沃知縣擢貴州道御史外轉太原知府京察謫寧州

判官遷知樂陵完縣

次獲鹿簡井陘顧兵憲

孤城萬古控幽燕喬木殘碑不記年路入井陘分趙晉
天開畿甸擁山川土門故傍封龍窟石邑猶存白鹿泉
西北和戎非上策使君此地好籌邊

王時濟一首

時濟字道甫稷山人萬曆癸未進士除戶部主
事歷郎中終衛輝知府

登高丘

清林人跡稀我來何所翫坐看嶺上雲天風莫吹斷

虞淳熙一首

淳熙字澹然錢塘人萬曆癸未進士授兵部職

方主事遷主客員外郎改稽勳郎罷去有德園

集

長孺少見知於王李賦才奇譎搜抉奇字僻句務不經人弋獲以為絕出於時賢頗心折湯若士屠長卿自詭以暮兀勝之雖未免牛鬼蛇神之誚可謂經奇者也

景泰窪

合沓衆山轉鴻溝界危岡貞松心不移偃蓋覆神堂欲
蛻龍為魚千古以慨慷土木骨縱橫魂來關塞長君王
奠鼇足太史筮苞桑宗廟救淪喪朱火寒有光迎駕誼
何篤覆轍戒難忘豈無延陵心重為亡國傷宮門一以
奪羨門竟迷方碧瓦易黃屋蓬顛西山傍杜宇啼舊痕
織烏集野棠坤維幸勿絕一窪得新藏靈表扶九宮何

必敝陰房碧血障胡塵芊芊白草芳高睇歌大招涕泗
灑衣裳

朱長春 十二首

長春字太復烏程人萬曆癸未進士知尉城常
熟陽信三縣入為刑部主事削籍有太復文集

詩話太復頗類孫太初其宰陽信狀海濱風土如海暗雲連舍春寒雨
近城沙田惟種黍鹵井不通泉過雨如霑雪無風自落沙白沙風裏下
黃日霧中生薄祿供囊藥齋廚費水錢頗盡其致他如折藕露華白采
菱秋水香悠然西湖曲坐對南屏山高樹晨光動空山眾響聞麥花來
社燕小雨破春泥落日餘高柳空江起暮鐘酒船晴盡出賽鼓暝猶聞
纜外春沙沒燈前獨樹斜蒼藤緣戶結翠鳥落階飛驛火依沙出春星
倚浦懸孤飛江上烏半滅雨中山皆秀句也晚學修真鍊形蓋不得
志而有託牧齋訕其登梯累十重學擗舉而墮地幾殞殆未必然

秋日詠懷

白雲自西來經風忽從東鳴鳩化蒼鷹世變安有窮昔

種蕙蘭花將以遺所同一人懷一心兩心故難終鶴鷖
熙春陽蟋蟀吟秋風萬類各有時吾其守愚庸

出三江口南下

日出漾清渚三江帆正開白憐茅步名山過青見芋蘿名邨
來海氣如秋雨春潮似薄雷空餘好山水已是越中回
赴歷下塗中作

白日散原霧秋光照井閭海田秋歲早寒木落風初天
地身長滯風塵役未除病夫心尚壯不敢憶鱸魚

舜廟

玉座垂衣古秋風謁帝祠蒼梧狩不反黃屋儼如斯石
鎖青苔井松巢白鶴枝歷山千古淚泉響至今悲

發縣次日過鹽山

宿雪古原清川陵動客情啼鳥非昨日嘶馬復空城世
路勞為役生涯恥薄名十年一墨綬暫解也身輕

六月復病寄弟

白霧連春瘴長風起夏寒三年幾死客每病欲休官短
髮催初服空牀媿素餐行藏日夜淚謀及室人難

再贈伯念

茂陵多病日詩句轉清新麗藻看時輩窮愁近古人尊
絲吳苑暮蘭草楚江春珍重凌雲賦君王問侍臣

對月

千乘城西百尺臺九河沙曲斷潮迴邊隅落日風常慘

海口初春霧未開南國漸遙空夢斷北人雖近少書來
自然對月淚堪下何況啼鳥聲更催

對雪

狂風吹雪海荒荒遊子將歸尚卧牀二月天邊未花草
三年寒色故衣裳即看慘澹迷虛牖轉復霏微壓短牆
寄語東皇休更妒暫開春暖放還鄉

移家

翠竹新栽映白沙碧湖深處此吾家欲逃城市移居遠
頗有山林發興賒野鳥乍過窺几席鄰人相見饋魚鰕
蓬蒿不比揚雄宅翻喜門無載酒車

端午

菖菹艾葉泛杯香
午酌曾軒對雨涼
野水茅籬三徑竹
貧家風俗五絲囊
轉因卧病朝參嬾
不是逃名隱興長
長憶九華明月扇
漢廷此日賜諸郎

入山

山深石色古洞草無行迹
何處有人家朝烟澗西白

茅國縉一首

國縉字薦卿歸安人萬曆癸未進士除章丘知縣入為廣東道御史謫知浙川遷南工部主事歷郎中有菽園詩草

過白門酬拙之贈別

孤帆渺渺指江汀飛盡楊花柳尚青
此去不堪頻北望

愁邊風雨滿新亭

莊履朋一首

履朋字中益晉江人萬曆癸未進士官戶部主事

別林尉

桑梓勤吾念憑君破寂寥
自今花下吏日折道傷腰象
郡風烟隔龍城瘴氣消
行春聊佐令亦足採歌謠

張壽朋三首

壽朋字冲齋號西江南城人萬曆癸未進士除刑部主事謫泰安州同知終廬州府通判有深息窩集

狂歌

夷門老侯生刎頸送公子此義豈不高感人安用死毛
薛亦風流諷言何婉美信陵賴相成歸國見終始身隱
世隨棄無復關人理悲哉豪俠流大道所不齒

西湖憩胡氏亭

中庭遙相望斗室更臨水云有賣藥人十年身已死柴
扉苦長扃我到為之啓鳥跡半幽牕蛛絲橫斷几花殘
沒階前竹亂生屋裏邨婦持帚來埽除亦堪喜破簷補
荻簾新火燒楓子可以坐老狂開尊炙枯鯉夕陽何處
歸大醉且閒止

翠屏房

江漁釣罷無市野寺殘僧似邨鉏圃須留行路愛山莫
掩柴門

湯顯祖 九首

顯祖字義仍臨川人萬曆癸未進士除南太嘗
博士遷南禮部主事謫徐聞典史量移知遂昌

縣有玉茗堂集

自王李之興霽零克塞義仍穿穴其
問力為解駁變而之香山眉山自言詩三變而

力窮其通懷嗜學不
自以為能事如此

詩話義仍填詞妙絕一時語雖斬新源實出於關馬鄭白其牡丹亭曲
本尤極情摯人或勸之講學笑荅曰諸公所講者性僕所言者情也世
或相傳云刺曇陽子而作然太倉相君寔先令家樂演之且云吾老年
人近頗為此曲惆悵假令人言可信相君雖盛德有容必不及演之於
家也當日婁江女子俞二孃酷嗜其詞斷腸而死故義仍作詩哀之云
画燭搖金閣真珠泣繡牕如何傷此曲偏只在婁江又七夕荅友詩云
玉茗堂開春翠屏新詞傳唱牡丹亭傷心拍遍無人會自指檀痕教小
伶其後又續成紫簫殘本身後為仲子開遠焚棄詩終牽率非其所長

宿浴日亭因出小浪望海

為郎傍星紀江湖常久居倏忽過南海片帆挂扶胥隱
隱岸門青杳杳天池虛培塿澹凌歷氣脈流紆徐潮迴
小洲渚龍鱗勒溝渠於中藏小舟其外懸日車雲影蒼
梧來咸池相卷舒孟冬猶星河淡月沾人裾陰陽盪揮
霍精色隱踟躕濯足章丘餘沐髮扶桑初濤輝臨侑盤
若木鮮芙蓉西顧連崦嵫東眺極扶餘小浪亦莞爾大
波始愁予喫舶自吞吐樓櫓成烟墟飛金出熒火明珠
落鯨魚吾生非賈胡萬里握靈樞晝羅浮外傳聞仙
所廬玉樹如冬青瑤芝若栴櫚陽鳥不日浴晝夜更扶
輿丹穴亦不炎好風常相嘘白水月之津一飲饑渴除

徐問汝仙尉去此將焉如

達奚司空立南海王廟門外

司空暹羅人面手黑如漆華風一來覲登觀稍游逸戲
向扶胥口樹兩波羅密欲表身後奇願此得成實樹畢
顧歸舟冥然忽相失虎門亦不遠決撤去何疾身家隔
胡漢孤生長此畢猶復盼舟影左手翳西日嗔匈帶中
裂啣隴氣噴溢立死不肯僵目如望家室塑手一何似
光景時時出墟人遞香火陰風吹萃律上有南海王長
此波臣秩幽情自相附遊魂知幾驛至今波羅樹依依
兩蒙密波聲林影外簷廊暝蕭瑟

麗水風雨下船棘口有懷

石城雙水門落日遠江介春潮風雨飛暮寒洲渚帶流
雲蒼翠裏緒風簫鼓外分披悟曾裂合沓迷新屆宿霧
緬餘丘生洲隱遙派地脈有虧成物色故明昧曲折神
易傷幽清境難會江花荒流放岸草悽行邁不見林中
人自撫孤琴對

送楊安入太原軍

星使三河外春王二月初風雲臨上黨花鳥入昭餘關
近笳聲急川遙騎影虛世途君自見長嘯欲何如

偶成

鴈影金河盡梅花玉管催江南望春色獨上鳳皇臺

浪石灘

濕渚陽暮風鳴浪石寒鷓鴣飛不起橫過釣絲灘

恩平中火

海氣層雲盡山烟遠燒浮孤臣隨早晚一飯是恩州

覲回宿龍潭

是歲春連雪烟花思不堪雨中雙燕子今夕是江南

臨江樓聞越舸且別悵然

亂帆秋影半江樓燕語滄涼傷客舟便去揚州且明日
故鄉今夜有人留

姚思仁一首

思仁字善長秀水人萬曆癸未進士除行人選
江西道御史巡按山東河南升通政司參議大

理少卿應天府尹入為通政使轉工部右侍郎
歷尚書太子太傅有萊竹堂遺橐

詩話肅皇帝信薊州人李昇嵩縣人刁騰之言分遣中貴崔閔主事沈應乾千戶全爵李鏞至其地相視銀礦是時遼東衛軍姜賢亦奏開蓋州歸州之礦遂以賢為礦長至萬曆間陳開礦之利者紛紛於是中貴四出海內騷然姚公為巡按仿鄭俠流民圖撰開采圖說進呈力請罷役不聽既而開礦者爭相仇殺羣盜蠢起畿甸則齊本數李庸史籍周言張世才石賓河南則張住朱世安趙仲保蘭一枝王西安山西則張守清郭貴三張盡忠許廷珍寧夏則楊戩本欲利國而國幾危矣公嘗注律以律文簡而易晦乃用小字釋其下 本朝頒行大清律實依公所注本也公居鄉孳莖為善年九十一考終余幼時猶及見之

嘉祥曾子祠

新祠結構澗之阿問俗年來向此過大勇萬人吾往矣
傳心一貫道靡他狸迴殘夢遺琴失瓜種先疇舊跡訛
自是聖朝崇典祀每聞金石奏安歌

盛萬年 一首

萬年字恭伯秀水人萬曆癸未進士除刑部主
事歷工部郎中出為福建按察副使歷廣東貴
州江西按察使遷雲南布政使未任卒有拙政

編附詩

詩話盛公浮湛藩屏數歷有年當其司臬羊城值倭人入寇躬擐介冑乘城擊破之於錦囊所嘗以一人攝五監司事案無留牘其還家詩云三黜已甘投嶺外一帆今喜到江鄉所居梅湖饒有魚稻之利菜場納稼專以寶書訓子孫先疇至今未改云

右江謠

昭江濼濼連邕管千厓赭碧清霜滿竹雞格格啼榕林
修蛇毒霧愁浸淫鳥言卉服繡項渠荒茅叢菁山頭居
時平莫負篋笭弩夜雨叢祠賽銅鼓

殷都一首

都字無美蘇州嘉定人萬曆癸未進士除戶陵
知州入為兵部員外歷郎中調南刑部京察去
官

離薺園

蘭生在深谷寧畏惡草滋受性偶不同托根從所宜夙
齡負耿介中路遭嶮巖棄置纓與綏歸來尋故蹊南山
荒豆田東陵沒瓜畦躑躅不自得為園且栖遲上有護
草堂下有春草池光風旦夕至引觴以為怡蘭者自為
蘭薺者自為薺達觀詎離俗全生甘息機寄言謝人徒
殊調勿見疑

詩記無美藉甚詩名而遺集罕傳離薺園一篇為王元美作也園在州
治鸚哥橋東有山有池亭曰壺隱曰晞髮軒曰鸚適室曰碧浪曰小憩
後池曰芙蓉沼元
美嘗自為作記

明詩綜卷五十四

明詩綜卷五十五

小長蘆 朱彝尊 錄

胥浦 姚弘緒 緝評

黃居中 一首

居中字明立晉江人萬曆乙酉舉人自上海教

諭遷南京國子監丞有千頃齋集

明立專勤學古得異書必

手自繕寫僑居金陵年八十餘猶篝燈誦讀達旦不勌古稱老而好學斯無媿焉

靜志居詩話監丞銳意藏書手自抄撮仲子虞稷繼之歲增月益太倉之米五升文館之燭一挺曉夜孜孜不廢儲勘著錄凡八萬冊墳土未乾皆歸他人插架深可惋惜也

寄兒

愛子遙相送臨岐轉憶家囊空嗟久客歲晏又天涯鬢

逐風塵短心驚道路賒離情兼旅思一倍惜年華

曾仕鑑 一首

仕鑑字人倩南海人萬曆己酉舉人歷官戶部主事有慶曆公車二集

游羅浮

石室春同入龍宮夜不眠青天雙瀑下明月二樓懸羽蓋悲陳迹金書憶昔年相攜采芝叟勸酒鐵橋邊

吳大纘 一首

大纘字于孝義烏人萬曆乙酉以官生中順天鄉試

齋居感興

蒼蚪九重淵玄豹七日霧欲以媚幽姿非為傲睨故驛請疲風塵夙夜謂多露廣游可成名無乃喪真素

陳邦訓 一首

邦訓字彞父鄞縣人萬曆乙酉中順天鄉試被黜後署海鹽儒學教諭官至漳州通判有玄感軒集

閣上

雲合沙頭樹人歸浦口烟空山喧宿鳥小閣俯長川衣短宜殘暑歌長入遠天南風吹几席不飲亦陶然

唐文獻 五首

唐公字元徵松江華亭人萬曆丙戌賜進士第

一授翰林修撰歷中允諭德左右庶子掌詹事
升禮部侍郎翰林院學士教習庶吉士卒贈尚
書加太子少保謚文恪有占星堂集

詩話郭文毅坐妖書被逮人莫敢前文恪周旋患難不避危機當時稱
為長者其治家整肅嘗患江南子弟無家法貽書告誡二子長諱允恭
字欽甫即彝尊之外祖也仕兩浙鹽運司副遷石屏知州家藏殿試策
神宗御題卷面瘦硬通神曾捧觀于占星堂上占星堂者文恪未第日
人或見奎宿于堂於是徐奉化獻忠作記孫漢陽
克弘以八分書于門屏亂離尚存今已易主矣

長安春日感懷

已覺吾衰久行藏未自由江鄉千里思夢醒五更愁鳥
自吟清晝花應笑白頭初衣頻取拭肯負竹林游

丁酉秋得請賜告

天意容棲遁烟霞入夢長淺才羞竊祿漸老學休糧戢

羽歸愚谷看人角智囊單車明日遠相似鴈隨陽

寄施起東丈為溧陽司訓

舊是文章伯居然弟子師絳紗傳舊業綠綬綰明時君
有施讎易吾慙唐勒詞空懷問奇意未敢問前期

登北固曉望

清晨凌曲磴一望攬雄圖天塹仍連楚雲帆半入吳遠
山籠日氣古寺隔烟蕪自覺登臨迴渾忘旅思孤

夜泊呂城

何處汀洲晚停橈信楫師雨餘霞散綺風靜柳垂絲野
寺鐘聲後夜潮人語時勞勞游子意隴笛不堪吹

楊道賓 二首

道賓字惟彥晉江人萬曆丙戌賜進士第二授
編修累官禮部左侍郎兼翰林院學士贈尚書
謚文恪有集

何稚孝云公詩優柔悅
憚而出之以鏗然之韻

梧江即事

春水萬山低江城宿霧迷征帆天上下去路粵東西荒
逕餘亭障樓船急鼓聲客心驚寂寞况復夜猿啼

別徐尉之任廣昌

遺愛苔溪上新綸楚水邊人疑徐孺子尉即漢神仙柳
色憐分袂春風動別筵當官三事在慎勿負先賢

薛三才一首

三才字中孺鄞縣人萬曆丙戌進士改庶吉士

授兵科給事中累官兵部尚書贈太子太保謚
恭敏有集

春暮花園即事

退食閒亭自委蛇憑軒忽漫問花期韶光已過九十日
闌藥纔舒三兩枝乍和酒香風細細長留春色景遲遲
看來最是牽情處嬈娜晴絲百尺垂

黃汝良一首

汝良字明起晉江人萬曆丙戌進士改庶吉士
授編修歷官太子太傅禮部尚書掌詹事府事
有河干集

登樓作

一卧滄江十二秋今辰獨上望京樓邊城幾處臨風嘯
關塞何人裂土侯萬里難傳青海信千峰不散白雲愁
孤臣有淚向誰灑敢道歸田便得休

何喬遠

一首

喬遠字稚孝晉江人萬曆丙戌進士除刑部主
事改禮部歷員外郎中謫廣西布政司經歷起
光祿少卿遷太僕少卿轉左通政歷光祿卿通
政使升戶部侍郎有鏡山何氏前後集

湘南雜興

桂林秋色滿清湘天畔登臺百粵長南入交州多蕙以
東來海國有扶桑雲浮衡嶽窺三楚風馭羅浮限五羊
鴻鴈稻梁無信息不知何地望江鄉

全天敘

一首

天敘字伯典鄞縣人萬曆丙戌進士改庶吉士
授編修歷官侍讀學士天啓初追贈禮部右侍
郎有鐵菴集

曉望

巖壑開新霽秋容倍可憐雲中聞水碓竹裏出廚烟捷
鼠穿松徑飢烏啄芋田閔農知感激瘠土幸豐年

袁宗道

二首

宗道字伯修公安人萬曆丙戌進士改庶吉士
授編修歷中允洗馬庶子贈禮部右侍郎有白

蘇齋集

伯修才不逮二仲而公安一派實自伯修發之

詩話嘉靖七子之派徐文長欲以李長吉體變之不能也湯養仍欲以尤蕭范陸體變之亦不能也王百穀王承父屠長卿雖迭有違言然寡不敵衆自袁伯修出服習香山眉山之結撰首以白蘇名齋既導其源中郎小修繼之益揚其波由是公安流派盛行然白蘇各有神采顧乃頽波自放舍其高潔專尚鄙俚鍾譚從而再變梟音馱舌風雅蕩然泗鼎將沉魑魅齊見言作俑者孰謂非伯修也邪

攜尊江上

郭外同君去清尊對水涯
寒潮鳴草徑積雪晃平沙
小艇乘流急人家逐岸斜
流連歸路晚高柳亂啼鴉

兩岸芙蓉

南垞與北垞岸遠渺難即
此處好行舟面而芙蓉色

吳應賓

二首

應賓字尚之又字客卿桐城人萬曆丙戌進士

改庶吉士授編修天啓初以理學召不赴加左
春坊右諭德兼翰林侍讀門人私謚宗一先生
有學易齋集

感興

雨氣澹將夕木末明殘霞流芳惜餘姿
宛轉歸泥沙物化一以遷歡樂為咨嗟
根株旣不定無乃空中華渺然念獨往
浩蕩隨無涯

題張洪陽閒雲館

賦就張平子飄然獨草亭
回環一水綠高下萬山青
避世曾金馬焚香對石屏
祇疑雲霧窟長護太玄經

丁元薦

一首

元薦字長孺長興人萬曆丙戌進士除中書舍
人歷尚寶少卿有尊拙堂集

馬君常云先生立朝未淹
期月痛哭言天下事皆關

繫國是維持清議遺文幸在風範
儼然匪汎同風雲月露之什也

詩話慎所仕無言責而彊直自隨屢折不回劉啓東目為名臣第一高
景逸亦謂正氣足以千古蓋東林諸公推許若是其作五君詠於許孟
中云夫子多苦心河津有正路於沈純父云之子
排天門隻手驅豐隆雖以贈友君子以為自道也

秋日廣寧圍急有懷仲父

仲父參戎幕遙聞羽檄飛官貧生事拙將弱壯心違客
夢關雲杳家書塞鴈稀曰歸腸欲斷何計突重圍

劉黃裳

一首

黃裳字玄子光州人萬曆丙戌進士除刑部主
事歷兵部郎中有藏徵館集

題小李將軍畫

画山何得用金碧小李將軍創其蹟近來僅數仇十洲
筆法雖工損氣格當年傳說文皇時陰山之旁陳六師
連峰疊嶂出大漠金碧照面光參差馬上大叫龍顏喜
世間山色無如此天開圖画北海間小李將軍筆法是
乃知將軍之畫有所傳即如此幅何工妍璠樓翠閣空
中懸綠松片片龍鱗然將軍逝後八百年猶有生氣飛
紫烟堂中風吹山欲動耳邊飛瀑鳴濺濺樓中之仙身
似鶴珊瑚鈎卷明珠箔蓬島能移席上開雲霞攬取尊
前落鄭生才高類此峰相邀把酒弄山松披襟若坐翠
山裏海上羣仙爾定逢

周獻臣 一首

獻臣字窾六臨川人萬曆丙戌進士除太康知縣改許州學正遷國子監博士升南京刑部主事京察謫福建布政司檢校轉龍安府推官有鷺林外編

道路憶家園

謝豹啼殘麥燕飛山花伴客送春歸家園此日無人賞
社雨冥濛掩竹扉

王士昌

五首

士昌字永叔臨海人萬曆丙戌進士歷官右僉都御史巡撫福建有投荒草

出都

八口家同在提攜出國門艱危心未剖慷慨舌猶存戀闕原臣志投荒亦主恩長沙憐謫所不敢賦招魂

三義廟

遺像丹青蝕英名過客聞中原曾百戰大業竟三分旗影搖山月爐烟結水雲恰逢邨社近盲鼓說遺文

武陵縣

武陵城北道十里接平疇沙際餘寒斂湖陰積氣浮叢篁編作戶獨木剡為舟指點仙源近清溪分外幽

黔中雜詠

南服天垂盡銅標向此分洞中扈吠日天半犢耕雲蠻

語逢人譯夷歌到處聞干戈新戰後殘照幾家邨

分宜道中

野菊花黃楓葉丹衝寒日日據征鞍擔囊行旅休相訝
蠻尉於今屬漢官

李啓美 一首

啓美字成甫一字念方豐城人萬曆丙戌進士

改庶吉士授檢討有李太史集

吳會甫云誦念方詩如野寺孤鐘令人塵襟頓

滌

送王則之假歸

千里一相送郊雲黯不飛潼關何處是孤鴈獨西歸柳
暗秦川失天高隴樹微如何向岐路春草正芳菲

黃承玄 一首

承玄字履常秀水人萬曆丙戌進士除工部主
事歷員外郎中出為湖廣參政調山東再補江
西進按察使遷河南陝西左右布政使升應天
府尹以右副都御史巡撫福建贈工部左侍郎
有盟鷗堂集

江上送陸伯生東歸

瓜步洲前歸思濃金焦忽送五更鐘一帆羨爾乘潮去
數遍吳山到五茸

王嘉謨 五首

嘉謨字伯俞直隸豹韜衛人萬曆丙戌進士除

行人選禮科給事中官至按察使

畿輔詩存
作布政使

有薊

丘集

詩話伯俞五言頗熟選理第北人用
韻恒以入聲雜上去讀故不多存

述懷

脈脈泉初生粼粼冰始泮嘯歌念古人俯仰成愁歎
賤本無方乘時若有判草木滿中唐旨鷗巢其岸本欲
慕崇高迺為耳目翫

樓兜橋

淵淵溪水中青蒲葉靡靡翳然林木間幽懷信予美
細藻唼潛鱗山梁雒文雉尋幽復遠涉濟勝良堪喜
夕陽忽西流平湖澹烟起慷慨賦新詩行歌出山市

西勾橋

微風何澹澹宿雨隨人飛遙望石梁前楊柳蔭重圍
淵壑寂無聲獨行向霏微寒芳自可藉寄賞幸不違
徒倚豐林間坦步徐言歸

盤山法藏寺

折坂殿懸厓悠然縱鞍韉繇繇谷口雲飄墮白如練
峰巒忽相冒奇石還驚眩大者數十尋小或等冠弁
峰巔有嵌宇歷歷皆可見永懷僧棲樂倍覺塵情倦
稀逢采芝侶獨立幾回盼

雙峰寺

遠眺翠微近雲木澹清姿石華浮半空飛泉激流澌
其

陽饒怪石小大紛參差萬嶺鬱相錯孤雲停不移中峰
構翠龕一一能仁祠山僧衣蘿薜雜以松蘚皮導我磨
蒼崖覽古生遐思

沈瓚 三首

瓚字孝通一字子勺吳江人萬曆丙戌進士除

南京刑部主事歷郎中出為江西按察僉事告

歸起補廣東僉事有靜暉堂集

李伯遠云子勺詩格蒼以古致沖以遠高者何

減魏晉次亦不

失為陳射洪

詩話子勺兄璟妙解音律撰南曲譜鄉里目為詞隱先生居家未嘗廢
絲竹有子恒失學子勺去官身為塾師教其兄子一門之內一選伎徵
聲一尋章索句論者
比之顧東橋兄弟云

游元陽洞

朝雲漸歸山松風晝淒緊重巒散晴暉皎日麗阡畛矚
嶺目俱遙循巖步方窘一山別作阿亂石聚成困徑穿
斧斤餘崖覆松蘿盡危磴曲緣澗近坡平中準洞啓石
豁豁風高樹凌躋僧舍密綴蜂樵柯露棲隼居人茂花
竹過客甘蔬筍迴思廿載前此地名跡泯七日鑿混沌
一朝見玄牝境闢地孕靈氣開人示朕幽夢屢相關孤
筇自茲引為誦邠生言無貽謝公晒

山中雨行夜宿民家

好鳥知農候嚶嚶灌木間荒村無埃館樵斧出柴關雨
暗車前路雲埋屋後山虛疑檐溜急溪水夜潺潺

立秋日送行

石頭城下路三面是長江此地新秋色映君江上艫涼
風動衣袂飛雨灑船牕無事嗟行役臨流倒玉缸

潘大復 二首

大復字徵復烏程人尚書季馴子萬曆丙戌進
士工部郎中有昆山堂詩草

同朱文寧庶常觀海

烟波杳無極縱目喜同君雲外千峰出潮平各浦分競
探蝴蝶窟驚起鷺鷥羣浮白宜茲地蕭蕭日就曛

江行阻風得來字

孤舟泊風雨日夜聽喧歷石燕排空至江豚鼓浪來人
家少烟火田畝半蒿萊愁緒那堪破呼童發舊醅

袁黃 三首

黃字坤儀嘉善人萬曆丙戌進士除寶坻知縣
遷兵部主事有兩行堂集

詩話職方導人持功過格鄉里稱爲愿人其說實本愛禮先生劉駟加
發揮焉然順親友兄弟皆自居以爲功終於心有未安君子之學無伐
善可矣

送陸五臺之任

移舟一送君離別在今夕耿耿秋夜長不寐成遠憶豈
無黃金壘可以滌胷臆我心匪白雲卷舒焉有迹彈冠
武水濱坐久暮山碧

卜居

結廬菰蒲中柴門映碧水蒹葭何蒼蒼兩岸秋風起

潯江夜泊

潯陽江上鷓鴣啼茅屋青燈隔水西
獨坐孤篷傷往事寒鴉飛盡楚天低

徐燠 十九首

燠字惟和閩縣人萬曆戊子舉人有幔亭集

張幼

于云惟和調匪偏長體必兼善力追古則盡滌時趨謝在杭云徐惟和才情聲調足以伯仲高季迪所微憾者古體稍不及爾

惟和詩為張幼于王百穀所推許屠長卿序之

詩話惟和力以唐人為主臬七絕原本王江寧聲諧調暢情至之語誦之蕩氣迴腸

送人游吳楚

津亭烟柳綠垂絲萬里關山匹馬遲
去國正當秋盡後登樓多在日斜時
楚江草長悲鸚鵡吳苑花深走麋鹿

話別何須共惆悵秋風搖落是歸期

旅次石頭岸

石頭城下水微茫回首鄉關驛路長
瓜步烟波連斷靄秦淮雲樹隔斜陽
秋高落木迷村舍夜靜寒潮到女牆
客裏愁心已如此一聞南鴈更淒涼

金陵故宮

先朝遺殿閉塵埃零落空勞過客哀
五夜銅壺乾罷滴六宮金鎖澀難開
翠華去後全無影羅綺焚餘尚有灰
弓劍盡埋烟雨冷椒房一半上蒼苔

金陵懷古

白門京闕舊山川朱雀烏衣夕照邊
百代荒陵崩夜雨

六朝遺殿鎖秋烟
臘脂歲久銷宮井
苔蘚春深繡御筵
往事淒涼無限淚
傷心最是建文年

閩王審知墓下作

玉輦何年去不回
霸圖千古總成灰
秋深兔穴依寒壟
歲久魚燈暗夜臺
故國關河甌越在
遺民蘋藻鼎湖哀
蓮花峰下黃昏月
猶見三郎白馬來

送邵武李太守擢憲滇南

昆明池水靜無波
擁傳新從棘道過
開府定能寬漢法
采詩曾不廢蠻歌
赴墟滇客龍名市
納款蠻王象渡河
他日勒功留片碣
點蒼如黛石嵯峨

送王玉生

作客生涯薄
依人去住難
春光無限好
空向異鄉看

客中寒食

去歲燕山道
今朝劔水濱
如何兩寒食
俱作異鄉人

漂母祠

落落千金報
悠悠國士心
從今慚漂母
不敢過淮陰

彭城懷古

雲龍山下鳥爭啼
戲馬臺前日欲西
莫謂楚宮今寂寞
王孫芳草正萋萋

客中贈別

吳姬把酒唱離歌
一片愁心奈別何
莫怪相看頻下淚
江南春色已無多

丹陽遇陳十八

丹陽渡口遇同鄉欲語匆匆怨夕陽君返江南我江北
雲山千疊斷人腸

郵亭殘花

征途微雨動春寒片片飛花馬上殘試問亭前來往客
幾人花在故園看

酒店逢李大

偶向新豐市裏過故人尊酒共悲歌十年別淚知多少
不道相逢淚更多

元夕懷李伯賢

往事傷心倍可憐故人今夜渺雲天燈光月色鞦韆影

已隔春風二十年

送李子行太守謫茶陵

一官何事又投荒楚峽猿聲幾斷腸正是長沙遷謫地
不堪夜雨渡瀟湘

芋江驛樓送張四之白下

春風吹柳萬條斜此去金陵驛路賒不必相思當後夜
片帆開處即天涯

交河道中

黃沙漠漠馬駝驛北地春光久自諳不用褰帷縱游目
斷無山色似江南

村中晚步

青山迴合抱清溪村徑陰陰鳥自啼落盡疎林秋色晚
水流楓葉過橋西

張文柱 二首

文柱字仲立崑山人士淪子萬曆戊子舉人臨

清知州 朱秉器云仲立詩清逸然多羈栖咨歎之語 孫齊之云仲立才高燦發託意幽玄正如冰壺秋月本宜著烟霞外

迺強使適俗故少年即有憂生之嗟

塞下曲

有鴈逐歸心無書返上林天山風不斷秋早雪花深白
草分秦甸清笳雜漢音將軍誇戰馬價重一千金

惜別

惜別復惜別殘更為爾遙青楓薄命葉黃柳斷腸條大

迴遲寒鴈江空急暮潮秣陵烟雨際留得鬢蕭蕭

李鼎 一首

鼎字長卿新建人萬曆戊子順天舉人有李長

卿集

寄題故園

三徑荒蕪久頻來入夢思空傳竹醉日不見柳眠時石
室藏雲滿山花帶露滋到家開北牖觸目是新詩

焦竑 二首

竑字弱侯上元人萬曆己丑賜進士第一授翰

林修撰謫福寧州同知追謚文憲有漪園集

詩話修撰晚掇巍科仕雖不達公望歸之亳州李文友仁卿詩云文章南國多門下翰墨西園集上才蓋實錄也詩特寄與若儲書之富幾勝

中簿多手自抄撮
惜近年俱散佚矣

西園

林泉颯欲秋閒園自成步駕言城郭遊翻愜滄洲趣臨
深杳難即躋險倏可度危藤緣澗上遠岫當牕露崖壑
既盤紆竹木亦交互怪石森餘株清川貫中路微雨逗
涼颺煩暑漸以去同人自相將杯酒豁情愫棲遲少日
懷緬邈平生故流光豈不邁延賞未云暮詠歸各怡然
撫景謝良晤

絕句

花明月淡海天秋三十六重烟雨樓數載欲歸歸未得
看君先上木蘭舟

吳道南一首

道南字會甫崇仁人萬曆己丑賜進士第二授
編修歷中允諭德少詹事兼侍讀學士遷禮部
右侍郎以憂去召拜禮部尚書兼東閣大學士
進太子太保戶部尚書兼文淵閣大學士贈少
保謚文恪有曙谷集

詩話古之國史恆以本朝之人述當代之事故文獻足徵出於一家者
無論已光武注紀定於永平武德貞觀國史成於顯慶宋則兩朝三朝
五朝七朝四朝先後撰述榻前論議斯時政有紀柱下見聞斯起居有
注類而次之謂之日曆修而成之謂之實錄然後一代之典備焉明則
第有實錄寶訓而已建文革除景泰附錄何以成一代之典章善大吳
文恪之言曰曾南面者常知史不可滅之義曾北面者當思名必先正
之文是兩朝帝紀不可不特書也萬曆甲午允大學士陳文憲公之請
詔工部葺史館禮部自尚書下同詹事春坊司經局翰林諸臣分門受
事先太傅文恪公領修孝宗大紀而吳文恪公領修河渠志今載集中
惜文憲公逝不獲竟其事今其條目志之類二十有二傳之類二十有

六讀吳公正史議其大略猶可觀也然如中官之驕橫
土司之順逆顧獨遺之何與因錄吳公詩附誌於此

送朱養淳太史典試江右

紫陌新軺夾道看詞臣分命出金鑿片帆左蠡乘新漲
一榻秋屏對早寒南國文裁運斤手西江派重采詩官
何當更問問閭苦歸與君王策治安

陶望齡 六首

望齡字周望會稽人萬曆己丑賜進士第三授

翰林編修歷中允諭德遷國子祭酒卒謚文簡

有水天閣歇菴二集 黃貞父云陶子詩為
韋為柳間似長吉

詩話周望早年詩格清越超超似神仙中人中歲講學逃禪兼惑
公安之論遂變為芸夫蕘豎而目白沙在泥與之俱黑良可惜也

旅次憶越中舊居

宴坐雲歸後開尊月上初春衫裁越布晚食飽溪魚白

鶴仙人箭玄夷使者書故鄉真可樂不是愛逃虛

送商叔護朱叔懋應試秣陵

仗劍他鄉意彈冠故友情秋風待行客落日事孤征尊

酒遠相命寸心言未傾思君似流水寄向石頭城

夜泊桃源

迢遞憐行役其如客思何孤雲將短櫂十月渡黃河水

泊兼鷗宿霜清聽鴈過更堪寒夜盡欹枕遠鐘多

塗中雜詩

一騎風塵裏千山縣郭東畏塗逢落日別思對孤鴻仗

策心逾遠談詩氣更雄驅馳丈夫事不必恨飄蓬

沛縣過高帝廟

路經舊沛山川古龍起中原戰鬪多一代雄圖開赤帝
千秋遺廟傍黃河雲歸尚識真人氣風起猶傳猛士歌
魂魄來游長此地漢宮秋色近如何

塗中雜詩

風塵忽換蒼鬢寒色偏侵紫貂上馬踏一邨月迴鞭避

一作迎獨木橋

董其昌 六首

其昌字玄宰松江華亭人萬曆己丑進士改庶
吉士除編修出為湖廣提學副使召入為太常
卿歷遷禮部尚書追謚文敏有容臺集

詩話趙承旨謚文敏尚書亦謚文敏兩公書画差足相
常董詩差不如趙鷗波之亭戲鴻之堂風流弘長一也

送陸伯生歸吳

神皋落木後秋水灌河時鄉夢催游子川程訪檝師自
憐玄尚白未遣素為緇等是春明路閒雲不可羈

望岱

百里看山眼迢遙岱色分應為天下雨不斷封中雲漢
簡千秋秘秦松萬壑聞何當馳匹練高揖碧霞君

同唐元徵宮允游善權洞

神功開混沌水府亘氤氲峽隱將飛石巖垂欲墮雲龍
堂陰壑迴鳥道亂泉分今日摩崖記知同藏史羣

送范爾孚北歸

旅食同千里分襟此一時烟沙征路遠風雨客帆遲鄉
夢隨芳草春愁帶柳枝平生任慷慨能不灑臨岐

登翠微亭

烟迷楊柳洲水拍芙蓉岸我憶南湖秋西山暮雲畔

題画

近水晚逾碧遠山秋未黃夕陽寒滿地松影落衣裳

高攀龍 二十二首

攀龍字雲從無錫人萬曆己丑進士除行人謫
揭陽典史起光祿寺丞歷官刑部侍郎都察院
左都御史坐忤逆闖削籍被逮赴水死贈太子
少保兵部尚書謚忠憲有高景逸詩

陳皇士云先生詩無意求工大

約忤寫自得之致

詩話先生天下規矩援世翼教不以聲律自繩然與歸待詔訂金石契宜同心之言自成蘭臭也

水居

薄暮登樓四望遠疇時雨旣降農人乍休乳燕來止儵
魚出游萬族有樂吾亦何憂

靜坐吟

我愛山中坐恍若羲皇時青松影寂寂白雲出遲遲獸
窟有浚谷鳥棲無卑枝萬物得所止人豈不如之耕巖
飲谷水常得中心怡

夏日閒居

長夏此靜坐終日無一言問君何所爲無事心自閒細

雨漁舟歸兒童喧樹間北風忽南來落日在遠山顧此
有好懷酌酒遂陶然池中鷗飛去兩兩復來還

湖上閒居季思子往適至

正爾山水間念吾烟霞友春風吹微波日暮倚楊柳我
友惠然至童僕喜奔走相別歎幾時相逢慮非久所歡
得晤言欲言仍無有默默各自怡一室閒相偶夜深不
能寐明月在東牖

七哀詩

肅肅秋風深漫漫秋夜長中夜百感集攝衣步空堂俯
聽蟲聲悲仰視明月光物色一如昨舊人何茫茫歲月
日以疎髣髴日以亡一朝成永訣千載空相望靜心易
生哀遺情難為方願從夢中路拙身至其旁

諸公招飲石城隲

勝會寧可常勿惜此淹留竹樹有嘉蔭班坐無俗流念
我平居日所愛在山丘願得素心侶引杯相勸酬今晨
愜幽興不醉將焉求未須敕太康此樂可忘憂卓哉斜
川人千載心悠悠

夜步

幽人夜未眠月出每孤往繁林亂螢照村屋人語響宿
鳥時一鳴草徑露微上欣然意有會無與共此賞千載
懷同心陶公調可仿

潮陽縣觀海

仲尼欲乘桴吾亦來海濱不作放逐客誰能得閒身澹
澹風日和蕩滌怡心神一笑萬象間偃仰得其真快哉
此日樂可以擬千春逝者只如斯世事徒繽紛安得無
家累終焉此垂綸

魯兩生

吾愛魯兩生面折叔孫子灑然揮之去身隱名不紀是
時風雲際豈不願膺仕大道吾所聞曲學有深恥從此
謝世人聊以保厥美

登子陵釣臺

西京亂有象佛士鬱不揚鄙哉通津子奄奄孔與張謙
默祇自衛貞剛乃銷亡士氣日交喪國勢遂不强為彼
蠹賊資其心實先傷卓卓嚴子陵抗志輕侯王辭榮去
上國垂釣來崇岡高風一以振芳躅久愈昌迺知姦修
士與世為隄防

登華頂峰遂至石梁斷崖觀瀑布

晨策凌絕頂夕棲入浚谷攢峰插天表飛瀑掀地軸昧
險鶩前賞升虛騁極目春風澹冲襟朝曦扇輕燠深桃
點澗紅弱柳抱溪綠想見花源人胡麻飯應熟神仙不
可期念此媚幽獨

發光靜坐 二首

偶來山中坐兀兀浹旬餘澹然心無事宛若生民初流
泉當几席衆山立庭除高樹依巖秀修篁夾路疎所至

得心賞終日忻忻如流光易蹉跎此日良不虛寄言繕
性者速駕深山居

落日在平野悵然懷千秋緬彼臨安區當年棲王侯樓
臺何鬱鬱冠蓋紛相酬一朝世事盡百代成荒丘徒存
指點跡令人心悲憂何如蓬廬士偃息巖壑幽圖書共
朝夕花木遞春秋觴酌洽朋好卧起親鳧鷗豈不念世
故中心自有求生有無窮娛既沒名長留

始歸

三旬通仕籍六旬始歸田中間立朝日未嘗淹三年拙
宦分自定遯世性所便每懷五湖志願棲一壑堅飛鳥
脫籠中游魚歸故淵豈誠異時好所好各有專驅逐車

馬塵何如松菊間晨起日三商夜坐月一天靜默契神
理夷猶翫簡編所務願不違至人樂已全

題歐陽宜諸素風堂

春風動庭草陳根坼新萌元化一以暢而我寧自縈浩
浩發情志悠悠念羣生物生自有涯秉心自有貞茅茨
已就治春畦復深耕蔬食聊自足萬事取不盈

謫居

并序

余謫居揭陽官舍幽清庭有盆魚有竹石楹前
榴花灼灼不絕樹間小鳥交交弄語長至後謝
病杜門益無往來終日靜坐讀易誦詩月明靜
夜活火焚香援琴小弄意興既極恬然而卧益

從容乎樂也賦詩志之

自昔悲羈旅局促亦奚爲昭曠苟在懷憑運與委蛇嶺
海何必惡四時有丹萸我生一甲子即事多所怡華館
絕塵氛水木澹幽姿好鳥時一鳴靜蘊流天機縱心八
極外欽之在幾微歷覽千古書此理不吾欺被服誠無
斲真賞欣自知持此以永念可用忘棲遲自非高堂戀
鹿門乃在茲

庚戌春月坡初成

浩浩月初上一坡正受之以我無營心當此獨坐時爲
籌世中事無樂可代茲長林寒飈息春風藹如斯萬族
各萌動我心豈不知俯視方輿靜仰觀圓象馳靈襟旣
無際一形安足私持以畀大鈞榮悴非所思

遊鴈蕩山

昔我愛丘山名勝在夢想去去三十年塵事空鞅掌茲
遊愜始願千里遂獨往望山屢馳騫入谷轉疑恍仰觀
秋瀑飛俯聽潭流響陽崖峙雄突陰洞藏奇敞幽尋碧
澗底遐矚紫霄上春風蕩輕陰百里見開朗青丹未可
圖文翰誰能髣髴心願止託回首空悵快勝地古今存
浮生俄頃賞安得結茅廬於此日偃仰

湖上

道人不識憂墮然罕所慮胸中有奇懷常得山水助時
乘酒半醺或值寐初寤獨往恣幽尋欣若有所遇有時

田言集卷五十五
五十四
深林行穿徑忽失路有時湖上還看雲忘所務凝目孤
鳶歸傾耳細泉注所造趣未極原陸任昏暮非關耽清
娛曾是秉遠慕閒心始造理快意多失步嗟爾行道人
迫迫焉所赴

喜雨

六月早既甚雨來亦不遲即看雲漠漠已覺黍離離興
劇惟需酒歡多且賦詩明朝應積水相與向東菑

引泉

次第竹根瀉相將得到家鳥啼春雨後流出滿山花

偶成

春來勝事逐時新早起風光倍可親忽見青天垂柳綠

此時愛殺樹邊身

馮從吾 一首

從吾字仲好長安人萬曆己丑進士改庶吉士
授山西道御史歷官副都御史謚恭定有少墟
集

戊申暮春講學太華山中

嘉會來喬嶽良朋喜共游白雲時去住野鳥亦夷猶雨
霽千峰翠春深萬木稠山靈真有待吾道重千秋

林堯俞 十一首

堯俞字咨伯莆田人萬曆己丑進士改庶吉士
除簡討累官太子太保禮部尚書謚文簡有谿

堂集

何穉孝云先生歷官大宗伯抵牾權閹不能久安其位歸一歲而遂卒其詩溫潤典則瀏麗輕颺見若甚易而不知其磨錯之難卑不可抑高不可亢淺而有章深而不窮斯太和之元音也

詩話陳文定善書嘗以南祭酒奏績之京王振致酒幣請書程子四箴文定書與之而却其幣論者躋之亡友莆田林嘉璣字衡者述其從祖文簡公亦善書法魏忠賢敦請不與忠賢矯詔命公題扁公大書畏天堂三字題曰禮部尚書某奉旨書時忠賢出餅啗公云出手製公以南人不慣食麪辭忠賢方銜之公遽請歸里陛見德陵謂曰長尚書乃欲歸邪賜之蟒玉以公儀表頎而長也若兩公者明哲保身淵然不可犯士大夫當以為師林子又言公五言律原出右丞誦谿堂集信衡者不我廷也

三月三日棠林修禊

良辰維上巳選勝遵水側灌木翳繁陰原疇免登陟長川羨游鱗高雲睇歸翼羽觴催莫停陽烏漸西匿

七里灘作

雙笳引綵舟鳴榔下建德既經漁浦口還望定山色沿

流苦奔峭入峽驚偈仄寓目恣游觀舉趾罷登陟一酌嚴陵祠清風邈難即如何謝人徒於焉解徽纆

聞黔中平志喜

皇風式九圍聲教暨邊鄙由來西南夷難用漢法理其居雜編氓其道羈縻耳撫馭乖所宜騷騷孰為弭黔本隸鬼方滇蜀相脣齒各自有君長號令亦齊止昨者糾諸樊西川亂無紀况乃安奢酋水蘭負堅壘目覩貴陽城壘擅同折箠我軍寡且弱日夕呼庚癸相距及歲餘如肉置諸机疾聲望外援割髮而噬指幸然抹兵至背城判一死又逢賊氣惰乍合便披靡既以解重圍亦足療瘡痂雖未極兵威庶幾褫不軌斯維社稷靈人力詎

至此但此全城功僉云李與史願懷往事虞勿生戰勝
喜如聞老鴉關去城僅五里

出黃河

纔過長淮口已見清河縣黃流昔頡洞茲焉束如箭更
值凍初開盪來冰數片量水僅尺餘輕舸常患冒買酒
澆龍神冀得南風便挂席就中央免入盤渦旋咫尺到
黃樓役夫辭帶緯

海東晚眺

暮春命中車言憩青溪浹徘徊芳樹林夕陽已在水東
望窮扶桑波濤盪地紀日月互吐吞雲霞幻奇詭天吳
晝不發珠母宵疑徙島嶼急樓船春疇間未耕鯨浪幾

時平漁歌處處起

夏日集高梁寺

一逕隔流水沿洄到寺門瓢分香積供榻借給孤園山
雨來花氣松風斷鳥言淹留未遽返暝色下高原

楓亭即事

落日楓亭驛秋風荔子園人烟山外盡漁榜夜深喧地
迴潮當寺僧閒月到門羣賢方豎義吾意已忘言

山行

肩輿纔出郭倚杖即看山霜葉暗樵路寒花悽客顏石
門通鶴柵松嶺入雲關去去紅塵隔鳴禽時往還

立秋

苦積連旬雨况驚一葉秋亂雲低復合大火暗潛流商
意迴蘋末笳聲到枕頭寧須感搖落不斷是邊愁

送海印住華嚴寺

雞足峰前寺相違知幾年山僧今易主舊路尚依然地
遠黃茅瘴池分玉澗泉時來訪靈澈一榻伴雲眠

送陳汝鑑大行入京

是日爲三月三日集棠林曲水

共來修禊事及此送君行花雨林間散蘋風池上輕酒
攜何次道歌借米嘉榮解作陽關疊休賡第四聲

陸彥章一首

彥章初名彥璋字伯達松江華亭人萬曆己丑
進士繇行人累官南京刑部侍郎

歸次盧龍

帝城東抱海山重迢遞單車出萬峰秋色長風吹白
鴈歸心落日下盧龍

傅新德二首

新德字元明定襄人萬曆己丑進士改庶吉士
除簡討歷官國子監祭酒贈禮部右侍郎謚文
恪有集

送郭青字參藩巴蜀

殊方幾載歎離羣忽漫相逢又送君萬里江湖龍劍合
一尊風雨薊門分峨岷迴出天連雪棧閣平臨馬度雲
蜀相威名應不負他時消息好相聞

送董兵備衡水

帝城南望楚江開，捧檄人看日下來。
萬里春光明使節，千年王氣接金臺。
雲連湘浦雙星度，天盡衡陽一鴈回。
今日長沙同內地，逢時翻羨洛陽材。

馮有經 一首

有經字正子，錦衣衛籍。慈溪人。萬曆己丑進士，
改庶吉士，授編修。歷中允、諭德、掌司經局、轉庶
子，後贈禮部侍郎。

登嘉禧寺

高樓切天浮，古木森在下。峰峰開金碧，
十二蘭若芳。林擁桃李怪，石帖松檟人。
語曠不喧啼，鳥無冬夏對。此

懷巖耕局促何為者

黃輝 一首

輝字昭素，一字平倩，南克人。萬曆己丑進士，
改庶吉士，除編修。歷中允、諭德。庶子少詹事，
兼侍讀。學士有怡春堂集。

詩話平倩盛有詩名而諸體未道所謂似是而非者

別汝鈍

使者分岐路，迢迢越五谿。一為孤鳳唱，
無復冷猿啼。

方大鎮 一首

大鎮字君靜，桐城人。萬曆己丑進士，除大名推
官，擢江西道御史，遷大理寺丞，歷左少卿。有方

大理集

詩話少卿與鄒忠介馮恭定高忠憲顧端文諸公講學首善書院書院毀篋得同人于野遂乞休自號野同翁年七十廬母墓而終鄉人私謚曰文孝先生其歲杪聞召詩云仕途百折如浮海客邸孤蹤似出家足以占所守矣

塗太僕揆字先生滇中寄書附荅

白雲迢遞點蒼居十載關心萬里餘枕上西風孤客夢
天涯北鴈數行書黃花竝憶漳河賦綠酒相從上谷車
夷蹠報施無定論燕山迷望轉踟躕

陳所蘊 二首

所蘊字子有上海人萬曆己丑進士除刑部主
事歷員外郎中調南文選司出為湖廣參政仕
至南太僕少卿致仕有竹素堂正續集

嘉善寺石壁

出郭探幽奇驅車詣長薄禪林一片石絕壁聳虛壑
疑巨靈擘復類鬼斧鑿俯臨百仞崖飛度千尋閣斗酒
此盤桓與子聊斟酌人生會有盡奈何苦羈縛願言解
徽纆負耒采靈藥

得家報家園小山已成

小築堪招隱新成曲水潄此時頻夢寐何日遂登臨但
有風塵色空懸江海心故人相問訊應笑未抽簪

徐應簧 六首

應簧字軒卿淳安人萬曆己丑進士官至參政
有鳳谷集

遠別

荒郊微雨歇一夜生秋草
曉起望行塵離愁滿懷抱
渺孤帆影迢迢萬里道
回首故鄉心憑誰共顛倒
人生衣食足在家貧亦好榮
枯代相嬾賢聖莫能保
昨日東鄰花今朝淨如掃

山中雜詠

二首

流水看不厭况兼溪上山
倚闌終日坐紅葉擁柴關
欲訪南鄰居遙遙在何處
隔浦見晴沙江村從此去

春夜夢吳心淵文學

昨夜從君歌竹枝醒來不記曲
中詞徘徊獨望西泠岸
正是潮平月落時

晚春

曉起扶筇步水涯綠楊烟裏酒旗斜
春來愁殺連纖雨纔見開花又落花

幽居

陽翟幽居好納涼兩間草屋一株桑
十年不出籬門外誰識人間杜五郎

戈用泰一首

用泰字來陽平湖人萬曆己丑進士授涑水知縣升南京刑部主事歷郎中有適適軒集

烟雨樓

平波四面八牕開盡日笙歌載酒來去矣
詩人誰管領

年年烟雨自樓臺

樓為太守龔公勉建

郝敬一首

敬字仲輿京山人萬曆己丑進士知縉雲永嘉

二縣擢禮科給事中謫宜興縣丞再知江陰縣

稍遷行人司副有山草堂嘯歌

王百穀云仲輿詩削去雕鏤組績獨寫性靈

詩話仲輿難經伉伉詩非所擅

讀春秋

五霸亂王章春秋實經始邦國有遺文脩緝人臣禮筆
削非新義興亡沿舊史直道在人心毀譽吾何事後儒
謾譎張紛紛凡例起穿鑿隻字間褒貶悉由已匹夫為
素王何以懲賊子惟有孟氏言庶得遺經旨

章士雅 三首

士雅字循之嘗熟人萬曆己丑進士除嘉善知縣入為刑部主事改南工部有薄游小詠

湖上曲

白蓮花開秋水生蘭橈桂楫羅衣輕郎君試看花深處
兩兩鴛鴦飛不去

天雄道中

天雄自昔推雄鎮鎖鑰於今重北門河近白溝人不渡
關連紫塞戍常屯重陰卷雪冰還合朔氣吹沙日易昏
極目荒原無匹馬車輪何事促王孫

暮秋經舊游有感

傷心客子來還去况是重逢秋色殘落葉又從孤館聽
青山不似故鄉看頻年馬足征夫老此夕雞鳴去路難
猶憶驛門衰柳樹一枝曾是舊時攀

朱家相 一首

家相字良輔候官人萬曆己丑進士除江陰知
縣調揭陽再調長興

送馮南雍量移德清尹

炎海憐孤憤臨溪喜量移才非黃綬吏望重白雲司桂
枻渺然去春江空所思雲霄飛鳥近遮莫數歸期

孫羽侯 四首

羽侯字鵬初華容人萬曆己丑進士改庶吉士

授禮科給事中有遂初堂集

小除日登玄石山歷石門七女諸峰

歲暮野遨遊駕言陟層嶂萬木日蕭疎十里峰遙向高
高玄石山獨立心怡曠巨人跡夔奇雲母泉清漾中與
石門連絕境凌蓬閣黃精神女供丹藥羣仙藏松檜蟠
靈根衣冠闕深葬嶺雪競晴暉崖瀑散餘瘴強臺意愜
多仙廬懷恣放江湖左右流鹿豕朝昏俯視藐培塿
四顧離塵埃安得同盧敖八極隨筇杖

春園雜詩 二首

到處徵求苦蕭然老一丘誅茅揚子宅種橘李衡洲濁
酒人間世青門故里侯梁鴻亦有婦隱計雅相投

野曠炊烟迴江深宿霧重藥苗經雨長竹筍破苔封高
枕移清晝深杯到夕春柴門無過客病體得從容

擬古樂府

郎船泊湖頭儂船傍湖曲夜半風浪生移船相竝宿

明詩綜卷五十五

